

Pitadi Bepañ'walañ metamdok pepa timeñ youyemguk

Yodakale Mede

Pitadi pepa timeñ youkuk i yadi kayoñbop malabumuñ wapum gineñ hatigij'walañ nadisukilitihik tubukilitiyemdok youkuk. Ala indij youkuk. Kayoñbop heki adi Jesu Kilisto'walañ mede momooñ wendok kotigoñ nadisuneñ. Jesu adi kumuña kotigoñ kaikaañ pilakuk tiña adi kotigoñ udaneñ bubundok yofafañeguk. Metam adi yofafañeñij wendok nadiña woomilune baak.

Biyagoñ, kayoñbop heki adi malabumuñ hekiij, ijoñ nemek u mintalak uyadi nadisukiliti gineñ fafañeñ yayatdok mintalak. Unduñ doktiña nadisukiliti tiña fafañeñ hatilune Jesu Kilisto kotigoñ udaneñ baak, kañ uñaniñ tuwañij momooñ beneñ.

Pitadi yokahañ mede youkuk

1 ¹ Nu Pita, Jesu Kilisto'walañ Aposel hatilatdi Bepañ'walañ metam kwetkwet danepupuheneñ Pontas eñ Galesiya eñ Kapadosiya eñ Esiya tiña Bitiniya kwetneñ buñambu hatitawiij hiditok pepa i youhamulat. ² Bañ Bepañ adi koomkwaha nadihebet tubu hali buguk wendiniñ folooñ netok gigit habukahileguk. Unduñ tiña hidi Jesu Kilisto'walañ medeñij takalidok nadiña Uñgonij Munabuli kamehambune hehitubu-lodaune hatihatihik Bepañdok mindapmaañ uñgonij tigiñ. Unduñ tubune Jesu diniñ nañgatdi hehiyoutewalandaune Bepañ'walañ hebeñ foloñ walandagiñ hatiij.

Bepañ'walañ siloñ tobogoñ eñ kulemadi hidi'walañkade tokiña hatuwaak.

Hatihati fafañeñij inditok gigit tiulidokooñ kameguk woomnimilak

³ Indi Wapumnik Jesu Kilisto'walañ Beu Bepañ niutumbayaneem. Adigoñ Jesu Kilisto kumuñ ginenij tubukaikaune pilakuk doktiña inditok

welekulema wapum tinimiņa hatihati kobuli fafaņeniņ tubumintanimguk. Indi wendok nadikunakunaleeņ hatiyam. ⁴Ala kougoņ hatigene kunum foloņ yohikwehik momooņ, fiit mu tibaak, walaņiņ hinek, fafaņeniņ, hiditok gigit yoņa tiulidokoguk hatak, u kahileneeņ. ⁵Hidi nadisukilitiniť hatiņ doktiņa Bepaņ ne'walaņ saņiniņiņiđi habudokolak. Adi unduņ titaulune Jesu Kilistodi mintaaņ hehitubu-lodawaak. Ala woņ adi kougoņ nai dapmawaakneņ-ku mintadakalewaak oņ. ⁶Hidi nai indidegoņ Bepaņđi nemek tibaak u nadiņa wendok nadifo tiņ. Iņgoņ oņ, nai muniniņ-kabe hatilune tikamanda mebimebidi mintahamuņa hehitubu-figitaneeņ.

⁷Hidi agaņ nadiņ. Gol^a adi fafaņeniņ mu halaak iņgoņ kudup gineņ heune daaņ folooņ hinek u dakalelak. Eņ nadisukilitihik adi gol kalakapmeeņ nemek folooņ hinek tilak. Undugoņ hinek tikamanda mebimebi mintahamiņ woņ adi nadisukilitihik Kilisto'walaņkade hatak u miņgoņ tubumintalak. Bepaņ adi unduku tiņa hidi'walaņ nadisukilitihik diniņ mebi tubudakalelak. Kaņ wendi Jesu Kilisto'walaņ wougigit tubuhautawaak. ⁸Hidi yadi Kilisto mu kagiņ iņgoņ oņ, hidi aditok hinek nadiņa welehikdi kahileiņ. Nai indidegoņ folooņ mu kaiņ iņgoņ oņ, fiit nadifo tiņa nadisukilitimiņ. Nadifohik wendi kwetfoloņ nadifo noli haliulak u yalakapmelak. Woņ adi manikdi mebiņiņ yodakalenimdok tuwot moņ. Moņ hinek. ⁹Unduņ doktiņa Bepaņ adi nai indidegoņ Jesu nadisukilitimilune habuņa netok habukahileeņ hanagitak.

¹⁰Koomkwaha polofet heki adi Bepaņđi nemek folooņ tihamulak wendegoņ medeņiņ yohautagiņ. Adi yadi Bepaņđi kotigoņ nibukahileeņ ninigilaak yoguk mede wendiniņ mebi nadidok kwanai baigoņ hinek tagiņ. ¹¹Nai uņaņiņ Kilisto diniņ Munabulidi polofet heki'walaņ welehik maaneņ hatiguk. Tiņa Munabuli wendigoņ Kilistodi folofigita mebimebi naditauyeņ me loļoņnit tibaak wendiniņ medeņiņ yohautaluguk. Wendoktiņa polofet heki adi nai deniņ hinek metam kotigoņ ninigitdok me u baak, eņ adi baakneņ nemek dediniņgoņ mintawaak, unduņ yonadiyagiņ. ¹²Polofet heki adi nehitok tiņa moņ, hiditok tiņa kwanailegiņ u Bepaņđi agaņ yenimbihikuk. Mindaņkade adigili Uņgoņiņ Munabuli kunum gineniņ kameune fooņ metamņiye yehitubu-lodaune adi'walaņ Mede Momooņ yohautaaņ haniņgiņ. Kaņ aņelo heki adi undugoņ nemek hidi kanadi tiņ u kakaņđok hinek nadiņa woom-hatigiņ.

Uņgoņiņ hatidok

¹³Unduņ doktiņa hidi helemehelemaņ nadisukilitidi nadinadihik tiulidokooņ hatihatihik momooņgoņ kadokoyaneeņ. Hidi nadisukiliti

^a 1:7 Gol adi kawade dabugoņ malabuhi kwet maaneņ ikiņ, ala kwanaimiņ tiņa yehitubu-mintaaņ moņgola wooņ kudup wapum gineņ heiņ. Kaņ datililiyiņ gol folooņ mintadakalelak, kaņ geņgeņ adi foloniņgoņ labulak kaņ gila beņa yakukiņ. Eņ gol folooņ adi beņa nemek fofooņ tutumbaņ.

hinek tiņa Bepañdok nadikunakunale tiņa woomilune adi siloņ tobogoņ Jesu Kilistodi miņgoņ mintadakaleune titiņdok yoguk u tihambaak.

¹⁴Hidi yadi wapmihi mede nadinadihinit wendok tuwolit hatiyaneeņ. Koomkwaha hidi yadi nadisuhinit mokit hatiņila hide'walaņ nadigalika hogohi mebimebi tihatiyagiņ. Iņgoņ nai indidegoņ adi unduņ kotigoņ mu taneeņ. Moņ hinek. ¹⁵Bepañ adi agaņ koom kutihaninguk. Eņ ne adi uņgoņiņ tiņa undugoņ kudiņiņ be titiņiņ didimeniņgoņ hinek tilak. Unduņ doktiņa hidi hatihatihik be nadinadihik be titiņhik kunilit Bepañdok mindapmaañ uņgoņiņ hatiyaneeņ. ¹⁶Diki indii hatak, Bepañ'walaņ Youkudipdi indii yolak, "Hidi yadi uņgoņiņ hatiņila talik be titiņ didimeniņ takaliņa taneeņ. Nu na uņgoņiņ hatilat doktiņa hidi maañ undugoņ, uņgoņiņ hatiyaneeņ."

Bepañ adi Jesu'walaņ nangatdi nihituwaguk

¹⁷Hidi Bepañdok "Betnik" yoņa niutumbaiņ. Betnik adi yadi wotnik doktiņa mu nihidanelak. Adi metam hatihati be titiņnikdi mebinik yobihilune nihidanelak. Unduņ doktiņa helemahelamaņ hidi kwetfoloņ iņoņ hatiņila indii nadiyaneeņ. Kwet i hatiyam adi yotnikwetnik mebi hinek moņ. I adi hogok buņambu hatiyam. Unduņ nadiņa Bepañ mulelem timiņa aditok nadimimbune loloņnit tuluwaak.

¹⁸Hidi agaņ nadiiņ. Koom adi mamahi-papahiye'walaņ hatihati be titiņ u behatiņa wendok kwanai tagiņ. Iņgoņ oņ, Bepañ adi agaņ hehituwaañ hatihati be titiņ foloņnit mokit gineniņ hehikagiyakuk. Tiņa nemek kwetfoloņ liwe tilak, silwa be gol wendi mu boiņa hehituwaguk. Moņ hinek. ¹⁹Adi yadi Kilisto diniņ nangatņiņdi hehituwaguk. Nangat woņ adi tuwaņiņ loloņnit hinek. Kilisto adi dompa mihiniņ walaņiņ hinek, kadakaniņnit mokit. ²⁰Bepañ adi Kilistodi kibikoņnik kameeņ nihituwadok koomkwaha kwet mu mintalune timenņgoņ yohebet tuguk. Kaņ nai dapmalune hatiyam indi nihitubu-lodadok adi Bepañdi Kilisto agaņ kameune miņgoņ mintaguk. ²¹Adigoņ hehitubu-lodaune Bepañ nadisukilitimiņ. Bepañ adikuyenņgoņ Kilisto kumuņ gineniņ tubukaikaañ tubupilali wougigit wapum miņguk. Unduņ doktiņa hidi'walaņ nadisukilitihik be nadikunakunalehik u Bepañ'walaņkade hatak.

Bepañ'walaņ mededi fafaņeniņ halaak

²²Hidi mede biyagoņ u nadiņa takaliune welehik walandaguk, unduņ tiņa hidi welehikdi me hekinolit foloņ hinek tigiņ. Unduņ doktiņa welehikdi kifolok tiņa hatiyaneeņ. ²³Tiņa hidi kobuli kotigoņ mintagiņ adi youli liwe tibaak wendi'walaņiņ moņ, adi youli kedem hinek, Bepañ'walaņ mede hatihatinit eņ fafaņeniņ halaak, uņaņiņ kadoņa kotigoņ mintagiņ. ²⁴Tiņa mede niņ indii hatak:

"Metam hogohogok adi kilihikit dabugoņ,

Folonamandaphik adi wowongimiņ dabugon,
 Kilihikitdi sigenelak eņ wowongimiņdi gilopmalak,
 25 Inņon Bepaņ'walaņ mede adi fafaņeniņ halaak."
 Bepaņ'walaņ Mede Momoon iņakoņ yohautaaņ haniņgiņ.

Jesu adi kawade hatihatinit

2 ¹Hidi indin nadineņ. Kadakanin mu titin, eņ yalaņ mede, eņ me yalamut eņ nadikwihita tiņa me yeniwoliwolike, nemek u hogohogok kwihililiwenekut taneen. ²⁻³Hidi agaņ koom nadidakaleen yogin, "Wapum adi momoon hinek." Unduņ doktiņa wapmihi iņakiņakdi nomdok hogok nadiin undugon hidi maan munabulihikdok nom momoon Wapum'walaņ tutumba uņgonin dinin Mede Momoon wendok nadisuyaneen. Unduņ tiņa uņakoņ welehek gineņ nadidahina bedikilitineen.

⁴Hidi Kawade Hatihatinit'walaņkade woņ galineņ. Adi Wapum kuyon, kwetfolon medi kahaņindaņ moņ yogin iņon Bepaņdi kaņ nadiune momoon hinek tubune netok yoņa kahileguk, ⁵ale hidi Wapum'walaņkade woņ galiņa kawade hatihatihinit dabugon mintaune Bepaņdi hehitomboyoulune Uņgonin Munabuli dinin yot tineen. Unduņ tiņa Bepaņ'walaņ muni heheņ-mebop uņgonin tineen. Tiņa munabulihikdi hehitubu-lodaune hatihatihikdi Bepaņdok muni unduņ hemineen. Kaņ adi Jesu Kilisto doktiņa nadiune utumbawaak. ⁶Bepaņ'walaņ Youkudip gineņ mede indin yogin hatak,

"Nu Saiyon tuwaiyen uņon kawade nin kamelat u kaņ nadineņ. Kawade daņiniņ momoon hinek u Bepaņ adi netok yoņa kahileguk. Ala nebek niņdi adi nadisukilitimimbaak adi yadi meka mu nadiwaak."

⁷Metam nediyeņ kawade u nadisukilitimiin aditok adi nadiune momoon eņ loloņnit hinek tilak. Eņ metam nadisukilitihinit mokit aditok adi indin yoņit hatak.

"Me yot mamaņ tiin adi kawade i moņ yoņa kahaņindaņ bikabugin iņon on, wendigon daņiniņ tuguk yatak."

⁸Eņ diki indin.

"Metam kawade wendok foloņon kayohik youfilidaneen. Eņ kawade bigim wendok foloņon kayohik youtigiyem tiņa maan udihiwaak."

Adi yadi Bepaņ'walaņ mede nadikabeleen mede wobu tiin doktiņa kayohik youtigiyem tiņa maudihilak. Woņ adi agaņ koom Bepaņdi unduņ tineen yoguk wendok tuwolit mintayemilak.

⁹Uņon tomboyoula indin hatak. Hidi yadi agaņ Bepaņ netok hinek habukahileguk, eņ ne'niņ silon kwanai titindok me wapuhi loloņnit harneguk. Eņ metambopniye uņgonin tiņa Bepaņ ne'walaņ metam, tiņa

hidi kadakanij diniŋ mambip gineŋ hatilune hautaŋij momooŋ gineŋ hanagila labuguk doktiŋa niutumbayaneŋ. ¹⁰Hidi koom Bepaŋ'walaŋ metam mu hatigij. Nai indidegoŋ adi agaŋ Bepaŋ ne'walaŋ metam hinek hatiŋ. Bepaŋ adi koom welekulema mu tihamguk. Nai indidegoŋ adigili kedem welekulema tihamulak.

Titij kedem hogok taneŋ

¹¹Notneye momohi hinek, nu indij hanimbe nadineŋ. Hidi kwetfoloŋ wahingon eŋ buŋambu hogok hatiŋ doktiŋa siloda kadakanij, welehiŋ kadakanij diniŋ memik u kadakaleŋ kelekuŋataneŋ. ¹²Unduŋ tiŋa metam Jesu mu nadisukilitimiŋ adi'walaŋ lekiŋgoŋhik foloŋ didimeningoŋ hatiyaneŋ. Unduŋ hatibune adi hidi'walaŋ titij kedem u kaŋ habudakaleŋ kadakanij titij haniŋ u wabineŋ. Unduŋ tiŋa hatigene kougoŋ Bepaŋ baakneŋ hidi'walaŋ titij kedem u kaŋ Bepaŋ niutumbaneŋ.

Wapum'walaŋ tipilapilaye-me hatiyaneŋ

¹³Hidi Wapumdok tiŋa gapman diniŋ mapme be me loloŋhinithiyedi yodoko mede mebimebi yotiulidokogij u nadiŋa tagimneyaneŋ. Mapme ne me loloŋnit hinek hatilak doktiŋa medeŋij nadi tiloloŋ taneŋ. ¹⁴Tiŋa gapman kwetkwet yapmetauguk adi'walaŋ mede maŋ nadiŋa tiloyaneŋ. Adigoŋ metam kadakanij titij yehitubu-didimeŋ kadakanijhikdok kibikoŋ yemaneŋ. Eŋ metam fofohi adi yeniutumba taneŋ. ¹⁵Bepaŋ adi hidi titij kedem tubune wendi metam kaulehi, nadisuhinit mokit'walaŋ mahik teheyemdok yoŋa nadilak. Adi unduŋ doktiŋa gapman'walaŋ mede nadiŋa tiloloŋ taneŋ hanilak.

¹⁶Kilistodi hidi kadakanij diniŋ folofolok ginenij hehifiyakukuk doktiŋa hidi yadi foloknit mokit hatiyaneŋ. Ala hatihati wendi kadakanij diniŋ yawe mu tibaak. Hidi yadi hide nadinadi hatijila Bepaŋ tipilapilaye timiyaneŋ. ¹⁷Noli indij taneŋ. Metam hogohogok titij momooŋ tiyemaneŋ. Tiŋa nohiye Bepaŋ nadisukilitimiŋ welesiloŋ tiyemaneŋ, eŋ Bepaŋ gikiŋgoŋ timiŋa wou nintiloŋ niutumbayaneŋ. Tiŋa mapme maŋ gikiŋgoŋ timiyaneŋ.

Kwanai metam diniŋ mede

¹⁸Noli indij, metam kwanai tuwahinit mokit tiŋ, hidi bombonŋihiyedok nadiyembune loune gikiŋgoŋ tiyemiŋa medehik tagimneyaneŋ. Woŋ adi bombonŋi fofohi eŋ kulemahidok hogok moŋ. Bombonŋi me koŋgolondahi maŋ undugoŋ tiyemaneŋ. ¹⁹Undihiyen folofigita mebinit mokit hamfit tubune hidi Bepaŋ doktiŋa hogok nadikulemaŋ hatibune Bepaŋdi habuŋa nadiune utumbaluwaak. ²⁰Diki indij. Hidi kadakanij tubune hidihine kabup nadikulemaŋ hatineŋ iŋgoŋ oŋ, wendiniŋ kibikoŋ maŋgoŋ moŋgotneŋ? Biyagoŋ,

hidi nemek momooŋ tineeŋ iŋgoŋ oŋ, hidihifit tubune hidi tokwihitanit mokit nadikulemaanŋ hatineeŋ adigili Bepaŋdi wendok nadihambune utumbaluwaak.

Jesu'walaŋ kayoŋtalik takalidok

²¹Hidi yadi unduŋ titiŋdok haniŋjit. Maŋgoŋde, Kilisto adi talitimenŋ tihamuŋa hiditok folofigita nadiguk. Ale hidi adi'walaŋ kayoŋtalik u kaŋ uŋgoŋ takaliŋa uneeŋ.

²²“Adi kadakaniiŋ nemu tuguk.

Eŋ maŋiŋdi yalaŋ nemu yoguk.”

²³Adi niŋkadakaune kibi mu yeniŋkadakaguk. Be folofigita mimbune kibikoŋdok mede mu yeniŋguk. Adi yadi kibikoŋ kwanai u Bepaŋ'walaŋ kohoŋ foloŋ kameguk. Adi hogokdi mede yodapmaanŋ didimeniŋgoŋ tilak. ²⁴Indi'walaŋ kadakaniiŋdi adi foloŋ loune koloŋdabek foloŋ moŋgola loguk. Unduŋ tubune indi kadakaniiŋ kotigoŋ mu tiŋa uŋgoŋiŋ hatiyaneem yoŋa unduŋ tuguk. Adi utubufigitagiiŋ wondi indi nihitubukedebaguk. ²⁵Hidi dompa nabugoŋ talik moiniŋ ugiŋ, iŋgoŋ oŋ, nai indidegoŋ adi agaŋ Domba Kadoko Momooŋ'walaŋkade udaneeŋ bugiiŋ. Adi kubugoŋdi hidi'walaŋ munabulihik yabudokolak.

Tamwoi'walaŋ mede

3 ¹⁻²Tam yohohiyehinit, mede timenŋ youlumun undiniŋgoŋ hiditok indiiŋ yobit. Hidi yadi hidetok nadiune foune yohohiye hebehik gineŋ gitagoŋ hatiyaneenŋ. Eŋ niŋ e indiiŋ hanimbit. Tam noli, hidi'walaŋ yohohiye adi Bepaŋ'walaŋ Mede Momooŋ sigilulum timiiŋ, iŋgoŋ, tamwoi, hidi wendok yeninto mu tiŋa hidi hide talik didimeniiŋ hatibune yohohiyedi hidi'walaŋ hatihatihik u yabunadiŋa welehek tubutakaleyaneenŋ.

³Hidi sigihik hogok tinahukulimindok kihik hapmuŋ foloŋ tikudikudile, eŋ dahidahi kudikudi momooŋ hinek, be komkom tuwaŋiiŋ loloŋnitdi tinahukukiiŋ wendi folooŋ mu tilak. ⁴Adi tobo tinahukut momohi, kadaka mu tineeŋ, wendi welehek maaneŋ tinahukukaneenŋ. Tinahukut woŋ adi welemomooŋ eŋ welekulema. Munabulidi welehek maaneŋ titiiŋ undiŋi tubumintaune welehek gumotalak. Tiŋa tinahukut fofoŋ eŋ fafaŋeniŋ wendi tinahukuyembune Bepaŋdi habune loloŋnit hinek tilak.

⁵Tam didimehi komihi adi unduŋ tiŋa nadikunakunalehik Bepaŋ'walaŋkade hogok kameyagiiŋ kaŋ wendigoŋ folonamandaphik momooŋ tuluguk. Tiŋa nehitok nadiune fofoyeune nehi'walaŋ yohohiye hebehik gineŋ kulemaŋgoŋ hatiyagiiŋ. ⁶Koom Sela adi unduku tiŋa Abalahamdok me bombonŋi niŋa maŋiiŋ mede tagimneluguk. Ala hidi munta mu tiŋa titiiŋ didimeniiŋ takaliŋa tiŋa adi'walaŋ wabiŋiye hatiyaneenŋ.

Mewoi'walaŋ mede

⁷ Aŋaŋ me tamhiyenit hiditokbo hanimbit. Hidi hogohogok wanakaŋ, tamhiyedut mede yonadi momooŋ eŋ kulemaŋgoŋ taneeŋ. Tiŋa tamwoi adi saŋiniŋhik longoŋ hatak doktiŋa yehitubu-loda fofongoŋ taneeŋ. Eŋ nemek folooŋ hinek adi indiŋ. Adi maanŋ hatihati fafaŋeniŋdok gigit hatiŋ unduŋ nadiyemiŋa adut welekubugoŋ tiŋa nadifo foloŋ Bepaŋ ninadiyaneŋ. Unduŋ tubune nemek niŋdi ninadihik kamehep tuwot mu tihambaak.

Kiukiut mede

⁸ Yoŋ adi wanaŋ kiuthik hanimbit. Hidi wanakaŋ hogohogok welekubugoŋ tiŋa yofulana kitubuloda momooŋ taneŋ. Unduŋ tiŋa hidetok nadiune fofonit tubune malabumuŋ be bulanigoŋ nai gineŋ welesiloŋ eŋ hekinolit momooŋ tiŋa kitubuloda taneŋ. ⁹ Mede wendiniŋ diki indiŋ hatak. Kadakaniŋ tihambune kibibo kadakaniŋ mu tiyemaneŋ. Be haniŋkadakaune kibimaanŋ mu yeniŋkadakayaneŋ. Hidi yadi tobo yeniŋkahaŋ taneŋ. Bepaŋ adi undugoŋ taneŋ yoŋa hanihehimaneguk. Ala hidi unduŋ tiŋa Bepaŋ'walaŋ kahaŋ yabukahileyaneŋ.

¹⁰ “Nebek niŋ adi kwetfoloŋ iŋoŋ nai

kweheyeniŋ hatiŋa nadigalika titiŋdok nadikaanŋ
adi mebelem kadokoune kadakaniŋ mu tuluwaak,
eŋ mami kamehemimbune yalaŋ mede mu yobaak.

¹¹ Unduŋ tiŋa kadakaniŋ sigilulum timiŋa nemek kedem hogok tuluwaak.

Tiŋa kulemaŋgoŋ hatiŋa wendok kwanaiŋiŋ fafaŋe tiŋa tuluwaak.

¹² Wapum adi metam didimehi'walaŋkade dau diwe tiŋa yonadihikdok magi kametnadi tilak.

Eŋ kadakaniŋ titiŋ heki adi Wapumdi yabuŋa sigilulum tiyemilak.”

Titiŋ didimeniŋ doktiŋa folofigita kedem nadidok

¹³ Hidi nemek kedem titiŋdok nadigalika tiŋa tulune nediyeŋdi yoŋa hehitubu-figitawek, ¹⁴ be titiŋ kedem doktiŋa hehitubu-figitaneŋ wendok adi welemomooŋ nadineŋ. Fidihidok hanimuntamuntaye tubune hehele mu taneŋ. Bepaŋdi hehikahaŋ tibaak doktiŋa gweheye mu taneŋ.

¹⁵ Hidi yadi Kilisto welehik maaneŋ kahileune adigoŋ Wapum tihambaak. Metam nolidi hidi'walaŋ nadikunakunale hatak wendiniŋ mebi nadidok haninadiune toboniŋbo tubu-udaneŋ yenimbihitdok helemahelamaŋ mede folooŋ tiulidokoyaneŋ. Iŋgoŋ mede u kulemaŋgoŋ eŋ gitagoŋ nadidakale hinek taneŋ. ¹⁶ Tiŋa hidi didimeniŋ hatiŋila kadakaniŋ mu tiŋa mede momooŋ yoyaneŋ kaŋ metam hanimunimuniŋefit tiŋ adi

hidi Kilisto'walaŋ titiŋ kedem takaliŋ wendiniŋ mebi nadiŋa mede yofit tiŋ doktiŋa meka taneer. ¹⁷Bepaŋ'walaŋ mede yohebet doktiŋa titiŋ momooŋ tiŋa folofigita nadinadi wendok nadiwene momooŋ tilak. Eŋ hide'walaŋ kadakanihik doktiŋa folofigita nadinadi wendok nadiwene titihik hogohi wendok tuwaŋiŋ moŋgokiŋ tilak.

¹⁸Biyakuyoŋ, Kilisto adi nai kubugoŋ hogok kadakanŋ diniŋ kibikoŋ kumumbune dapmaguk. Adi yadi didimeniŋ hinekdi kadakanŋ titiŋ indi Bepaŋ'walaŋkade nipmewene unduŋ tuguk. Adi kwetfoloŋ me namandap hatilune ulukumunŋiŋ. Ingoŋ Bepaŋdi tubukaikaune pilali munabuli hatilak.

Imeyout diniŋ welewele

¹⁹Munabuli hatiŋila wooŋ me koom kumunŋiŋ diniŋ munabulihik yot fafaŋeniŋ gineŋ hatiŋiŋ u Bepaŋ'walaŋ Mede Momooŋ yenihautaguk. ²⁰Metam woŋ adi koomkwaha Nowa adi muwage kwanai tihatilune Bepaŋdi baigoŋ nadikwambundaŋ wele tubutakale tineŋ yoŋa woomyemguk, ingoŋ adi mede wobu tigiŋ. Kaŋ metam lufomkabe, 8 hogokdi muwage wendok maaneŋ logiŋ, kaŋ ime gabuŋdi tubupilali yanagilu Bepaŋdi yehitubu-lodaguk. ²¹Ime woŋ adi Imeyout diniŋ welewele. Maŋgande, Bepaŋ adi Imeyout diniŋ imedi kotigoŋ hanagitak. Imeyoutdi sigihik diniŋ geŋgeŋ youtetdok moŋ. Moŋ hinek. Woŋ adi hidi Bepaŋ'walaŋ namanda foloŋ walaŋiŋ hatidok mede yofolok tigiŋ. Eŋ kotigoŋ hanagitdok tali adi Bepaŋdi Jesu Kilisto kumuŋ gineniŋ tubukaikaŋ tubumintahamguk. ²²Unduŋ tiŋa ne kunum foloŋ looŋ Bepaŋ'walaŋ kohoŋ didimeniŋneŋkade ilune aŋelo heki lolonhinit be saŋiniŋhinit adi nehitok nadiune founa adi'walaŋ hebeŋ foloŋ hatiŋiŋ.

Folofigita gineŋ dediŋ tiŋa nihitubu-lodalak

4 ¹Kilisto adi folofigita nadiguk doktiŋa hidi maŋ undugoŋ titiŋdok fafaŋeneer. Unduŋ tiŋila indiŋ nadisuneer. Nebek niŋ folofigita nadilakdi kadakanŋ bikabuŋa sigilulum timilak. ²Unduŋ doktiŋa kwetfoloŋ hatiŋa nai kougoŋ halimilakneŋgoŋ siloda kadakanŋ mebimebi mu tiŋa Bepaŋ'walaŋ maŋiŋ mede hogok tiŋalooŋ hatiluwaak. ³Hidi nadisukilitihinit mokitdi hatiŋiŋ undiniŋ u agaŋ koom tuwot hatiŋiŋ. Unduŋ hatiŋila kadakanŋ indiŋ tihatiŋiŋ. Nemek kadakanŋ tigigine be siloda kadakanŋ mebimebi, be ime fafaŋeniŋ kakaŋ nanaŋ be kale nanaŋ kakaŋ nanaŋ be hinamuni tiŋa ime fafaŋeniŋ kikalakapmeŋ foloŋ nanaŋ, tiŋa Bepaŋ'walaŋ mede biŋa bepaŋ yalayalaŋ hekidok tipilapilaye tiyemtiyem, unduŋ hatiŋiŋ. ⁴Kaŋ yoŋ adi nadisukilitihinit mokit adi kadakanŋ diniŋ maaneŋ hatilune hidi mu yehitubu-lodaiŋ doktiŋa mu nadidakaleeŋ hanintoŋa haniŋkadaka tiŋiŋ. ⁵Ingoŋ hatigene kougoŋ kaipmuŋ hatineer be kumuŋ tigiŋ wanaŋ medehik yodapmaŋdok

saɽiniɽ halimilak adi'walaŋkade mede kwanai tineeɽ. ⁶Kumuɽ tigiɽ adi indiiɽ doktiɽa Bepaɽ'walaɽ Mede Momooɽ yenhautaniɽ. Adi kwetfoloɽ diniɽ folonamandap doktiɽa kadakaniiɽ diniɽ kibikoɽ tiɽa kumuɽ tigiɽ. Eɽ Bepaɽ'walaɽkade ulodineeɽ adi munabuli diniɽ namandap tiɽa kedem hatineeɽ.

Nai agaɽ dulalak doktiɽa tiulidoko titiɽdok

⁷Nemenemek hogohogok dapmandok nai agaɽ dulalak doktiɽa hidi baigoɽ ila nadidakaleɽila didimeniiɽgoɽ nadikwambundaanɽ kedem ninadiyaneeɽ. ⁸Tiɽa hidi welehikdigooɽ hinek nadikwambundaanɽ welesiloɽ tiɽa menot taneeɽ. Mangande, welesiloɽ gineɽ hatiɽa kadakaniiɽ bibiiɽ kedem taneeɽ. Wendi nemek noli hogohogok yalakapmedapmalak. ⁹Tiɽa Bepaɽ'walaɽ metam noli buɽa hidigut itoune kaɽ momooɽgoɽ hinek yabudokoyaneeɽ. Hidi kwanai u titiɽdok yolakata adi mu taneeɽ. ¹⁰Hidi Bepaɽdi silooɽ momooɽ mebibebi hamguk u metam molomolom hahamulak, ala gitagoɽ yabudokooɽ behatiɽa silooɽ tobogoɽ tali mebibebi haliwiin u tiɽila kiulihi tiɽa hatiyaneeɽ. ¹¹Nediyeeɽdi Bepaɽ'walaɽ Mede Momooɽ yobaak adi yadi didimeniiɽ yobune Bepaɽ ne'walaɽ mede hinek tibaak. Nebek niɽ kwanai mineeɽ woɽ adi Bepaɽdi saɽiniɽ mimbune wendok tuwot tibaak. Hidi unduɽ tubune metamdi nemenemek hogohogok tineeɽ u kaɽ Jesu Kilisto wou folooɽ Bepaɽ niutumbaneeɽ. Kaɽ saɽiniɽ be youtumba u adi'walaɽkade hakukdi haliwoooɽ halaak. U biyagoɽ.

Kilisto wou doktiɽa meka mu titiɽdok

¹²Notneye hinek, hidi tikamanda diniɽ folofigita fuliiɽgoɽ mintahamulak wendok nadibedi tiɽa nemek gitipmuɽ hinek mintanimilak yoɽa boho mu taneeɽ. ¹³Hidi Kilistodi folofigita nadiguk undugoɽ nadiɽila welemomooɽ nadiyaneeɽ. Ala hatigene kougoɽ wougigitnit miɽgoɽ mintadakaleune kaɽ welemomooɽ hinek nadiɽa yonadifo wapum tineeɽ. ¹⁴Hidi Kilisto wou doktiɽa haniɽkadakaune Bepaɽdi hiditok nadiune utumba tuluwaak. Nemek unduɽ tihambune Bepaɽ'walaɽ Munabuli wougigitiiɽdi hidi'walaɽkade foooɽ hatilak u kedem nadineeɽ.

¹⁵Tiyauge hidi'walaaniɽ niɽdi mik be kubo be kadakaniiɽ mu titiiɽ be titaboloɽet doktiɽa kwadi hekiɽa yot fafaɽeniɽ gineɽ fowaakneɽ ala nadinadiɽila hatiyaneeɽ. ¹⁶Eɽ niɽ adi Kilisto diniɽ kayooɽbop hatilak doktiɽa kwadi hekiwaak be yot fafaɽeniɽ gineɽ kameune wendok nadiune mekaɽgoɽ be bulaniɽgoɽ adi mu tibaak. Adi yadi Kilisto wou u kame hatiɽa Bepaɽ niutumbawaak. ¹⁷I nadineɽ! Bepaɽ adi meɽimeɽiye indi'walaɽ mebinik nadinadi kwanaiiɽtiɽ tububihila titiɽdok nai dulalak. Indi'walaɽkade tububihila titawooɽ Wapum'walaɽ Mede Momooɽ

sigilulum timiinj'walaŋ tubudapmalune nemek dediningoŋ hinek mintayembaak?

¹⁸ “Me didimehi yahaŋedok kwanaimiŋ nobu tiŋa kaŋ me Bepaŋ sigilulum timiŋa kadakanij tiŋj hekidok adi dedinj tiyembaak?”

¹⁹Wendoktiŋa nediyen Bepaŋ'walaŋ hebet takaliŋa mik-kwadi folofigita gineŋ loneeŋ adi molomhik yehitubu-minta tuguk adi'walaŋkade ulodiŋa titiŋ fofooŋ hogok tomboyoula tiyaneen. Adi yadi undubo yooŋ, undubo yooŋ mu tilak.

Indetok nadinene fofonj tuluwaak

5 ¹Nu talitimeŋ nohikdi notneye talitimeŋ uŋoŋ hatiŋj hiditok mede hanimbit. Kilisto adi folofigita nadilune nu nagoŋ dauned i hinek kagut. Ala hatigene Jesu wougigitnit mintadakaleune u maŋj kahilewaat. Nu wendoktiŋa mede indiŋ hanindidimewe nadineŋ. ²Bepaŋ'walaŋ dompa bop yabudokodok hapmegiŋ hidi yadi kwanai-mede haniŋgiŋ doktiŋa moŋ, Bepaŋdi nadilak wendok tuwot welehikdi yabukahileeŋ yabudokoyaneen. Tiŋa undugoŋ muneen bomboŋ tubumintadok nadiŋa moŋ, welehiŋ eŋ kwanaidi folooŋnit titiŋdok nadiŋa taneen. ³Be hidetok nadiune loloŋnit tubune moŋ, adi dompa yabudokoŋ Bepaŋ'walaŋ Mede Momooŋ u hidegoŋ takaliune habuŋa takaliyaneen. ⁴Ala kougoŋ hatigene dompa yabudoko wapum ne buŋa tuwahik dapmandapmaŋnit mokit kuloŋj tehindilendileŋnit mokohambaak.

⁵Mekuyahi naŋgat kaipmuŋ, hiditok maŋj indiŋ hanimbit.

Bepaŋ'walaŋ Youkudipdi indiŋ yolak:

“Bepaŋ adi metam nehitok nadiune loloŋnit tiŋj adi'walaŋ kasop diliteleyemilak. Iŋgoŋ metam noli nehitok nadiune fofooŋnit tiŋj adi yehiulihiŋa siloŋ tobogoŋj tiyemilak.”

Unduŋ doktiŋa hidi yadi hidetok nadiune founne me talitimeŋhiyedok nadiyembune loune adi'walaŋ hebehik foloŋ kulemaŋgoŋj hatiyaneen. Tiŋa undugoŋ, metam hogohogok, hidi hidetok nadiune fofooŋnit tubune kitubuloda taneen. ⁶Bepaŋ Saŋiniŋ Molom'walaŋ namanda foloŋ hidetok nadiune fofonj tubune hatineen. Unduŋ tiŋa hatineen ala adi'walaŋ nai mintawaak uŋaniŋ hanihehibelowaak. ⁷Bepaŋ adi momooŋ hinek habudokolak doktiŋa nemek wendok be wendok nadibedi tiŋj hogohogok u kwihililiweneen Bepaŋdok mindapmayaneen.

Saŋiniŋ Molom ne nihikasopnelak

⁸Hidi hide nadididimeen kikadoko taneen. Memikhik wapum, Sadaŋ, adi fowa dabugoŋ^b undiniŋ tiŋa i be i tiŋa kumuyewit yoŋa maŋiŋ ŋaŋ tiŋa tobodindiŋ^c tihatilak. ⁹Ale hidi nadisukiliti tiŋa fafaŋeŋ yali

^b 5:8 Gilik mede gineŋ adi laion dabugoŋ yolak. ^c 5:8 “tobodindiŋ” adi kiyaneen woŋambuŋat tilak wondok yolak.

kelehapene tikutneen. Nohiye kwetkwet noli gineŋ hatitawiinŋ adi folofigita hidi nadiin undiniŋgoŋ nadiin. ¹⁰Biyagoŋ, hidi folofigita nai muniniŋ nadilune Bepaŋ siloŋ tobogoŋ Molomdi kasop tihamuŋa hehitubu-kilitiŋa hehitubu-damda tibaak. Adi Kilisto ne'walaŋ wougigit dapmandapmanŋnit mokit gineŋ noŋgoŋ yayatdok hanihehimaneguk. ¹¹Adi'walaŋ saŋiniŋŋiŋ u hakukdi haliwooŋ halaak fafaŋeniŋ. U biyagoŋ.

Mede yokiliti

¹²Nu mede yoŋ adi Sailas nimbe youhamulak. Nu aditok nadiwene me notne folooŋ hinek tilak. Nu adi Bepaŋ'walaŋ siloŋ tobogoŋ diniŋ mede muniniŋ haniŋa indiiŋ haniŋgiginelat: mede woŋ adi folooŋ hinek ale wendiniŋ maaneŋ fafaŋeenŋ yatneen. ¹³Metam Babilon kwetneŋ^d hatiŋa Bepaŋdi Jesu'walaŋ kayoŋbop hidut mintadok yehidaneguk, adi welemomooŋ mede hiditok kamehamiiŋ. Eŋ mihine Mak adi maan nadisuhamulak.

¹⁴Hidi Bepaŋ'walaŋ Mede Momoŋdi kitubukiliti tiŋa menot momooŋ tiŋa hidebo kohokukut tiyaneen. Tiŋa Kilisto dut hatiinŋ, hidi'walaŋkade kulemadi wanakaŋ tokidapmaanŋ hatuwaak.

^d 5:13 Babilon kwetneŋ youkuk woŋ adi Lomahidok nadiŋa youkuk. Lomahi'walaŋ titiŋ u yadi Babilonhidi titiŋ tigiŋ nabugoŋ doktiŋa unduŋ youkuk.